



Asiaat, 6.januar 2017

Inatsisartut suleriaasianni § 37 naapertorlugu Naalakkersuisunut imaattunik apeqqute-qarpunga:

1. Timersuutini assiginngitsuni nunatta unammisartoqarnerup tunngaaticigut Naalakkersuisut pitsaanngorsaaniarlutik - qaffassaaniarlutik qanoq pilersaaruteqarpat?
2. Nunatta unammisartui nunanut allanut unammiartornissamut qaaqqussaagaluarlutik akissaqannginneq piffissaqannginnerluunniit pissutigalugit pisinnaajunnaartarneq Naalakkersuit qanoq isumaqarfigaat? Iliuseqarfigineqassamaarpa?
3. Nunanut allanut unammisartoqarnerup tunngaaticigut (landshold) pitsaanngorsaaniarlutik Naalakkersuisut amerlanerusunik aningaasaliinissaminut pilersaaruteqarpat?
4. Nunanut allanut unammisartuutitta nunanut allanut unammiartornerminni aningaasaticigut annaasaqartannginnissaat anguniarlugu qanoq pilersaaruteqarpat?
5. Nunanut allanut unammisartuuneq soqutinernerulersinniarlugu Naalakkersuisut qanoq pilersaaruteqarpat?
6. Nunanut allanut unammisartuutitta angusarissarluarnerulernissaat anguniarlugu Naalakkersuisut qanoq pilersaaruteqarpat?
7. Nunanut allanut unammisartut assersuutigalugu; isikkamik arsaattartut, assammik arsaattartut, ujakkaartartullu periarfissaat qaffassarneqassappata; ulluinnarni sungiusarnissamut, nunanullu allanut unammiartortarsinnaanermut tunngatillug, taava aningaasat qanoq amerlatigisut pisariaqartinneqarsinnaanera pillugu Naalakkersuisut qanoq takorluugaqarsinnaappat?

(Inatsisartuni ilaasortaq Peter Olsen, Inuit Ataqatigiit)

Taamatut apeqquteqaateqarninnut assersuutitut taarusuppakka futsal-mik nunanut allanut unammisartuutigit.

Qanittukkut KNR-radiokkut nalunaarutigineqarpoq futsal-mik nunanut allanut unammisartuutivut nunarsuarmi pissartanngorniunnissamut piareersaataasumik Kroatiami unammiaarnissamut qaaqqusaasimagaluartut. Ajoraluartumilli GBU-miit qaaqqusissut tamanna naaggaartariaqarsimavaat aningaasassaaleqineq aammalu piffissaqannginneq tunngavilersuutigalugit.

Taakkuinnaangillat: aamma siorna tusarpara arnat assammik arsaattartuutigit nunarsuarmi pissartanngorniunnissamut peqataanissaminut periarfissinneqaraluarput, taamaattorli tamanna pisinnaasimangilaq aamma aningaasassaaleqineq pissutigineqarluni.

Tamanna ajuusaarnarpoq. Inuusuttorpasuit nunatta siunissaasa periarfissatsialassuit periarfissiissutigineqartut atorsinnaangippatigit aningaasassaaleqineq piinnarlugu.

Nunatta nunanut allanut unammisartoqarnerup tunngaaticigut atugassarititaasut pitsaanerusariaqarput pitsaanngorsarneqartariaqarpullu.

Inuiaat peqqissut nukittuullu pilersukkumallutigit neriorsuinikuuvugut. Inuiaallu peqqissut nukittuullu pilersinnissaannut timersorneq aqqutissanut ilaavoq, minnerunngitsumik qaffasissumik timersorneq eqqarsaatigalugu. Maligassiusussagut pitsaanerusumik aqqutissiuttariaqalerpagut.

Taamaattumik paaserusuppara tamanna pillugu Naalakkersuisut qanoq pilersaaruteqarnersut.

Ullut qulit qaanngiutsinnagit akineqarnissara kissaatigaara.